

Här Claude WISELER
Chamberspräsident
LËTZEBUERG

Ministère de l'Agriculture, de l'Alimentation et de la Viticulture	8
Référence : 265/25	
30 AVR. 2025	
A traiter par	
Copie à	

Lëtzebuerg, den 30. Abrëll 2025

Esou ewéi den Artikel 80 vum Chambersreglement et virgesäit, biede mirlech, dës parlamentaresch Fro un d'Madamm Ministesch fir Landwirtschaft, Ernährung a Wäibau an un den Här Minister fir Ëmwelt, Klima a Biodiversitéit weiderzeleeden:

"An Däitschland verbreet sech aktuell d'Schilf-Glasflügzikade aus de südleche Regionen weider an aner Bundesländer. D'Bauern, déi Gromperen, Rommelen a Zockerrüben ubauen, lafen domadder Gefor hier Ertrag deelweis oder ganz ze verléieren. Et ass ze bemierken dat et sech bei dësem Schädling em eng Aart handelt, déi lokal scho laang ze fannen ass a sech éischter bei Lëtchen opgehalen huet.

Bei dësem Befall verwielegen d'Planzen an et ginn Auswierkungen op hir Wuerzelen. Schonn elo stellen d'Bauere signifikant Reduktiounen bei den Ertrag vun dësen dräi Geméiszearten fest. Als méiglech Léisung huet déi däitsch Regierung elo eng kuerzfristeg Zouloossung fir verschidden Insektengeferde erteelt.

An deem Kader wollt mir der Madamm Ministesch fir Landwirtschaft, Ernährung a Wäibau an dem Här Minister fir Ëmwelt, Klima a Biodiversitéit folgend Froe stellen:

- Sinn der Madamm Ministesch an dem Här Minister Fall vun dësem Bakterienbefall hei am Land bekannt?
- Falls jo, ginn et Acteuren oder Initiativen, déi sech dëser Problematik ugeholl hunn?
- Gëtt et a punkto Präventioun eng Zesummenaarbecht mat anere Länner?"

Mat déiwem Respekt,



André BAULER
Deputéierten



Luc EMERING
Deputéierten



**Äntwert vun der Ministesch fir Landwirtschaft, Ernährung a Wäibau op d'parlamentaresch Fro n°2270
vum 30. Abrëll 2025 vun den éierewäerten Députéierten André Bauler an Luc Emering**

- **Sinn der Madamm Ministesch an dem Här Minister Fäll vun dësem Bakteriefall hei am Land bekannt?**
- **Falls jo, ginn et Acteuren oder Initiativen, déi sech dëser Problematik ugehol hunn?**
- **Gëtt et a punkto Präventioun eng Zesummenaarbecht mat anere Länner?**

D'Schilf-Glasflügelzikade (*Pentastiridius leporinus*) ass nieft aneren Zikaden, e potenzielle Vecteur vu sougenannte Phytoplasmen. Dat si spezialiséiert Bakterien, déi Planze befallen a schiedegen. Bei de Gromperen ass et *Candidatus phytoplasma solani*, den Erreeger vun der "bakteriellen Knollenwelke" oder Stolbur. Dës Krankheet féiert zum Verwielege vun de Gromperestäck, Erdragsminderungen a Qualitätsverloschter wéinst sougenannte "Gummiknollen". Fir de Mënsch besteet kengerlee Gefor. D'Schilf-Glasflügelzikade kann nieft d'Stolbur och d'Krankheet "Syndrome de Basse Richesse" an de Rommelen iwwerdroen. Dëst resultéiert an engem reduzéierten Zockergehalt bei de Rommelen, wat zu Ertragsverloschter bis zu 40% fir de Bauer bedeeite kann. Wéi bei Stolbur, ass och dës Kränk net geféierlech fir de Mënsch.

Bis haut goufe weder d'Schilf-Glasflügelzikade nach d'Schuederreger Stolbur a "Syndrome de Basse Richesse" a Kulturplanzen zu Lëtzebuerg nogewisen. D'Administration des services techniques de l'agriculture (ASTA) ass mat hire verschiddene Servicer un dëser Problematik drun.

De Stolbur *Candidatus phytoplasma solani* ass laut dem Planzengesondheetsrèglement (UE) 2016/2031 e sougenannten RNQP, e reglementéierten net-quarantäne Schuederreger. Den RNQP däerf am Vermeerungsmaterial vun enger bestëmmter Kultur guer net oder nëmme minimal oprieden. De Vektor an de "Syndrome de Basse Richesse" sinn net reglementéiert.

Setzgrompere mussen laut der respektiver EU-Vermarktungsrichtiv an dem Planzengesondheetsrèglement fräi vu Stolbur sinn. Dofir gëtt et bei der Zertifizéierung vun de Setzgromperen, engem offiziellen an obligatoreschen Qualitätssécherungssystem, europawäit eng Nulltoleranz fir dës bakteriell Krankheet. Dëst gëtt bei der Inspektioun vu sämtlechen Stécker, op deene Setzgrompere produzéiert ginn, offiziell kontrolléiert. Soubal am Stéck eng krank Planz festgestallt gëtt, muss se mat de Knollen erausgerappt an zerstéiert ginn. Zousätzlech müssen op der Recolte vun deem Stéck Analysen am Laboratoire gemaach ginn. Wa krank Knolle fonnt ginn dierf di komplett Recolte vum Stéck net als Setzgrompere benotzt ginn. D'Kontrollen am Kader vun der Zertifizéierung sinn eng routineméisseg Prozedur, och fir aner Problemer a Krankheeten. Esou kann de Bauer, deen z.B. lessgrompere produziéiere wëll, op gesond Planzematerial zréckgräifen.

De Service fir Phytopathologie vun der ASTA ënnersicht reegelméisseg Planzematerial op dës Krankheeten a schafft dobäi enk mat auslänneschen Laboren an Experten zesummen.

Och dëst Joer ass e Monitoring vun der Schilf-Glasflügelzikade an ufällege Kulture geplangt. D'Zil ass et, e fréit Erkenne vun den Zikaden ze erméiglechen, fir sou fréi wéi méiglech preventiv Moossname géint déi

potenziell Krankheeten ze treffen, déi se iwwerdroe kënnen. Wann Bauere krank Planzen bemierken oder mengen esou eng Zikade gesinn ze hunn, kënnen se dem Planzeschutzservice vun der ASTA Bescheed soen.

Déi zoustänneg Servicer vun der ASTA stinn a Kontakt mat däitsche Fuerscher aus engem Europäischen Innovationspartnerschaft (EIP) Projet fir op besteeënd auslännesch Expertisen zum Monitoring vun der Glasflügelzikade an dem Zikaden-Management kënnen zeréck ze gräifen.

Meldungen zu befallenem Planzematerial ginn an der Reegel iwwert europäesch Alerte-Systemer de Servicer vun der ASTA matgedeelt an si kënnen dann de landwirtschaftleche Betriber a Vermaarter Bescheed soen, falls néideg.

Communiqué par les services concernés de l'ASTA

(service de phytopathologie, service de certification des semences et plants, service de protection des végétaux, service agri-environnement, recherche et innovation)

Lëtzebuerg, den 5. Juni 2025

(s.) Martine HANSEN

Ministesch fir Landwirtschaft, Ernährung a Wäibau